

TEMPI PASSATI

Supra a lu chianu di Santa Maria,
'mpalatu chi paria 'nu lampijuni,
mi 'ndurìa tuttu , pemmu aspettu a ttia,
torcià lu codhu chi nno potìa cchiuni.

E tu arrivavi tutta ammaddammata,
cu nnu spìnzaru novu e nnu faddali,
cu na sottàna virdi , damascata :
parìvi 'na madonna tali e qquali !

Oh ! ti lu giuru, ch'a cchidhu mumentu
No ndavìa posa, no nd'avìa ripàru :
volìa mu nd'aju l'ali di lu ventu
e mu volu 'nzemi a ttia, trisòru caru !

E qquandu dhi la Chiesa tu nescìvi
A mmenzu a ttanti e ttanti giuvanedi,
cchiù ti guardava , cchiù mi piacevi,
bbedha finn'a la punta di li pedhi !

Ah... quando penzu a lu tempu passàtu,
crìdimi ciàngiu comu a nu cotraru...
E mmo tuttu finìu , no nc'è rriparu,
su quasi vecchiu...menzu arripicchiàtu !

Francesco Laruffa

www.associazionelaruffa.org